



NJOFTIM

Zyra e Rregullatorit për Energji (ZRRE) sot ka hapur Shqyrtimin e Jashtëzakonshëm për përcaktimin e të hyrave maksimale të lejuara për të licencuarit KEK (Korporata Energjetike e Kosovës) dhe KEDS (Kompania Kosovare për Distribuim dhe Furnizim me Energji Elektrike).

Me qëllim që të paraqes më në detaje kërkesat e këtyre dy Operatorëve si dhe qëndrimet e veta, ZRRE ka publikuar në webfaqen e saj www.ero-ks.org Raportin Konsultativ të Shqyrtimit të Jashtëzakonshëm të Tarifave të Energjisë Elektrike në kuadër të SHTE8.

Ky Raport Konsultativ po ashtu ka për qëllim të informoj dhe përfshijë palët e interesit që të japin kontributin dhe komentet e tyre në këtë shqyrtim të jashtëzakonshëm, që ka ardhur si pasojë e dëmeve të shkaktuara nga shpërthimi i ndodhur me 6 qershor në TC Kosova A të KEK si dhe ndërprerjes së paplanifikuar të prodhimit të energjisë elektrike. ZRRE thekson se Raporti ka për qëllim përfshirjen e palëve të interesit në këtë proces dhe nuk paraqet Vendim të ZRRE-së.

Tarifat e rregulluara me pakicë përcaktohen nëpërmjet tri proceseve kryesore: a) shqyrtimeve periodike (në këtë rast janë përcaktuar tarifrat 5 vjeçare në vitin 2013), b) Përshtatjet e rregullta vjetore (në këtë rast janë përcaktuar tarifrat në vitin 2014), dhe c) Shqyrtimet e jashtëzakonshme (për këtë çështje është hapur ky konsultimi publik).

Raporti Konsultativ shqyrton vlerësimet e të licencuarve lidhur me dëmet e shkaktuara nga shpërthimi i 6 qershorit dhe ofron rekomandimet e ZRRE-së për mbulimin e kostove financiare, të cilat janë të nevojshme për një furnizim të rregullt. Pra, një ndër arsytet më të rëndësishme për këtë shqyrtim të jashtëzakonshëm tarifor është të ofroj siguri të furnizimit me energji elektrike për të gjithë konsumatorët, për të parandaluar rreziqet e mundshme të reduktimeve. ZRRE mirëkupton konsumatorët të cilët kanë ankesa për shqyrtimin e jashtëzakonshëm pas përmbylljes së procesit të përshtatjeve të rregullta, mirëpo në anën tjetër duhet të respektoj të gjitha dispozitat ligjore të sektorit të energjisë duke përfshirë këtu edhe të drejtën e operatorëve për të lejuar kosto të arsyeshme për funksionim të sistemit energjetik.

Në këtë raport janë përmbledhur vlerësimet për shqyrtim të jashtëzakonshëm dhe raportet e dorëzuara nga operatorët e licencuar. Në shkresën e dërguar ZRRE-së më 10 qershor 2014, KEK ka vlerësuar se kostoja financiare e sanimit të gjendjes është €7 milionë që, sipas tyre, kalon 12% të vlerës së të hyrave maksimale të lejuara për Vitin e dytë relevant (përshtatjet e rregullta të vitit 2014) prej €139.5 milionë. Për më tepër, KEK vlerëson se do të humbasë një pjesë të konsiderueshme të të hyrave të lejuara nga aktiviteti i gjenerimit të energjisë elektrike sikur shpërthimi të mos kishte ndodhur. Rrjedhimisht, KEK ka kërkuar hapjen e shqyrtimit të jashtëzakonshëm të të hyrave maksimale të lejuara për kompensimin e dëmeve të shkaktuara nga shpërthimi. **Pas vlerësimeve të bëra dhe të prezantuara në këtë raport, ZRRE rekomandon të priten rezultatet e hetimit të shkakut në mënyrë që të kuptohet nëse ka qenë apo nuk ka qenë Ngjarja e Jashtëzakonshme nën kontrollin e Gjeneratorit të Rregulluar ashtu siç përkufizohet në Paragrafi 1.3 (i) i Shtojcës 7 të Rregullës për Vendosjen e Çmimeve të Gjenerimit.**

Po ashtu në këtë raport janë paraqitur raportet e Kompanisë Kosovare për Distribuim dhe Furnizim me Energji Elektrike (KEDS), përgjegjëse për furnizim dhe import të energjisë elektrike. Sipas vlerësimeve të KEDS kjo kërkesë është bërë për të mbuluar ndryshimin në mes të prodhimit dhe konsumit në



Kosovë, i cili është afektuar në mënyrë të konsiderueshme për shkak të mungesës së një sasive të gjenerimit vendor që duhet të mbulohet nga energjia e importuar me çmime më të larta. Përveç kësaj, shpërthimi ka rezultuar në zvogëlimin e energjisë që është lejuar të eksportohet në krahasim me nivelin e supozuar gjatë përcaktimit të të hyrave maksimale të lejuara të KEDS-it në përshtatjen e fundit vjetore (2014). **Si rezultat i ngjarjes së 6 qershorit 2014, ndikimi neto në të hyrat e lejuara të KEDS është €12.4 milionë që përbënë 5.18% të hyrave të lejuara të KEDS prej €239.96 milionë. ZRRE vlerëson se është kaluar pragu i materialitetit dhe rekomandon përshtatje të të hyrave të lejuara për Furnizuesin Publik në vlerë prej 5.18% më shumë se të hyrat e lejuara me parë me 24 qershor 2014 për Furnizuesin Publik.**

Vetëm pas të gjitha vlerësimeve për dëmet e kësaj ngjarje, ZRRE ka pranuar ta hap shqyrtimin e jashtëzakonshëm tarifor. Në këtë vlerësim të ZRRE-së, sikurse në të gjitha Vendimet e tjera për tarifën e rregulluar me pakicë, ZRRE gjithmonë është munduar të kontrollojë dhe t'i mbajë të ulëta kostot e sistemit energjetik në Kosovë në mënyrë që tarifën të jenë të përballueshme për konsumatorët e rregulluar. Duhet të theksohet se përveç obligimeve ligjore, nga analizat e ZRRE-së shihet qartë se zgjedhja qëndron ndërmjet hapjes së shqyrtimit të jashtëzakonshëm për të mbuluar këto kosto shtesë dhe mos lejimit të kostove shtesë që do të rrezikonte sigurinë e Furnizimit me energji elektrike. ZRRE-ja vlerëson se reduktimet e energjisë elektrike kanë një kosto shumë më të lartë në krahasim me rekomandimet në këtë dokument.

Raporti do të jetë publik në faqen elektronike zyrtare të ZRRE-së dhe ftohen të gjitha palët që të japin komentet e tyre në lidhje me kërkesat e kompanive dhe vlerësimet e ZRRE-së. Komentet e palëve të interesit duhet të dërgohen me titull “Komente për Shqyrtimin e Jashtëzakonshëm” deri më datë 22 gusht 2014 ora 16:00, në adresën elektronike info@ero-ks.org ose në adresën postare Rr. Dervish Rozhaja nr. 12, 10000 Prishtinë, Kosovë.